

Här Claude Wiseler
President vun der Chamber

Lëtzebuerg, de 22. Dezember 2025

Här President,

Esou ewéi den Artikel 80 vum Chambersreglement et virgesäit, biede mir Iech, dës parlamentaresch Fro un d'Madamm Landwirtschaftsministesch weider ze leeden.

Déi ustiechend Rannerkränkt „Lumpy skin disease“ (LSD) ass zanter 2015-2016 an der EU nogewisen an huet sech iwwert déi südlech Länner eraus an leschte Wochen a Méint virun allem a Frankräich verbreet. An de leschten Deeg koum et an eisem Nopeschland zu Protester. D'Bauere wieren sech dergéint, datt laut EU-Reegelen de ganze Véibestand muss gekeult ginn, soubal e positive Fall festgestallt gëtt, wat zu héije wirtschaftlechen a soziale Konsequenze fir d'Landwirtschaft féiert. Eng Alternativ wier eng Impfung, mee och déi kann negativ ekonomesch Suiten hunn. An dem Zesammenhang wëlle mir folgend Froen un d'Madamm Landwirtschaftsministesch stellen:

- Wéi ass Situatioun vum Lumpy Skin Disease am Moment zu Lëtzebuerg?
- Huet sech zanter dem Juli eppes un de Recommandatioune vun der Administration luxembourgeoise vétérinaire et alimentaire (ALVA) geännert?
 - Wa jo, wat?
- Ass d'ALVA virbereed, wa sollt e Fall vun LSD hei zu Lëtzebuerg detektéiert ginn?
- Wat fir Moosname ginn am Fall vun engem positive Befund ergraff?
- Huet d'ALVA genuch Impfdosen op Stock, falls no engem positive Fall d'Béischte musse geimpft ginn?

- Ginn et no de Protester Bestriewungen, déi aktuell eenheetlech europäesch Reegelingen am Fall vun LSD ze adaptéieren?

Här President, mir bieden Iech, eisen déifste Respekt unzehuelen.



Stéphanie Weydert

Deputéiert



Jeff Boonen

Deputéierten



**Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°3377
vum 22 Dezember 2025 vun den éierewäerten Deputéierten Stéphanie Weydert an Jeff Boonen**

Wéi ass Situatioun vum “Lumpy Skin Disease” am Moment zu Lëtzebuerg?

Zu Lëtzebuerg ass bis ewell nach kee Fall vu “Lumpy Skin Disease” nogewise ginn. D'Situatioun zu Lëtzebuerg gëtt aktiv iwwerwaacht woubäi 2025 11 Analysen ob LSD duerchgefouert goufen.

**Huet sech zanter dem Juli eppes un de Recommandatioune vun der Administration
luxembourgeoise vétérinaire et alimentaire (ALVA) geännert? Wa jo, wat?**

D'ALVA huet d'Betribler sensibiliséiert zu de neie Fäll vun LSD, dass am Fall vun engem Verdacht schnellstméiglech Kontakt mam Veterinaire oder mat der ALVA opzehuelen ass.

Déierenhalter goufen doriwwer informéiert, hir Biosécherheetsmoosnamen um Betrib ze verstärken, wéi beispillsweis am Fall vun engem Zoukaf sécherzestellen, datt nëmme Béischten aus fräie Gebidder mat engem Gesondheitszertifikat an déi uschléissend obligatoresch Quarantaine respektéiert ginn. Generell gouf recommandéiert d'Déieren, no Méiglechkeet, géint Vektoren ze schützen.

De Groussdéiereveterinaire goufe konkret Virgoensweisen am Fall vun engem Verdacht matgedeelt.

Ass d'ALVA virbereet, wa sollt e Fall vun LSD hei zu Lëtzebuerg detektéiert ginn?

Jo, am Fall vun LSD zu Lëtzebuerg setzt d'ALVA d'Moosnamen no der europäescher Déieregesondheitsgesetzgebung, déi an engem nationalen “Plan d'urgence” festgeluecht sinn, ëm.

Wat fir Moosname ginn am Fall vun engem positive Befund ergraff?

LSD ass, laut Europäescher Déieregesondheitsgesetzgebung, kategoriséiert als eng A-Krankheet, d.h. bei engem positive Foyer vun LSD ass eng direkt Eradikatioun virgeschriwwen.

D'Moosname bestinn aus Bekämpfungsmesuren, wou engersäits d'Euthanasie vun dem betraffene Rannerbestand an déi fachgerecht Eliminatioun vun de Kadavere virgesinn ass. De positive Betrib gëtt adequat gebotzt, desinfizéiert an desinsektizéiert.

Anerersäits ginn ëm de positive Betrib eng “Zone de Protection” an eng “Zone de Surveillance” mat strenge Restriktiounsmesuren an enger verstärkter Iwwerwaachung vun den Béischten en place gesat.

D'Duerchféiere vun der Noutfallimpfung ass een Deel vun dëse Moosnamen.

**Huet d'ALVA genuch Impfdosen op Stock, falls no engem positive Fall d'Béischte musse geimpft
ginn?**

Et gëtt e Kontrakt mat engem Impfstoffhiersteller, dee kuerzfristeg 200.000 Dosen Impfstoff garantéiert zur Verfügung stellt fir eng Noutfallimpfung duerchzeféieren.

Ginn et no de Protester Bestriewungen, déi aktuell eenheetlech europäesch Reegelen am Fall vun LSD ze adaptéieren?

Et ginn aktuell keng konkret Bestriewunge fir déi europäesch Reegelen a Punkto LSD-Reegelen ze adaptéieren. Eng Zréckstufung vun enger Krankheet bedéngt ee laangwierige Prozess, dee matt enger wëssenschaftlecher Risikoanalys verbonnen ass.

Lëtzebuerg, den 15. Januar 2026

D'Ministesch fir Landwirtschaft, Ernährung a Wäibau

(s.) Martine HANSEN